

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD SREBRENİK

PRIJEDLOG

ODLUKA

O JAVNIM PARKIRALIŠTIMA NA PODRUČJU GRADA SREBRENİK

OBRADIVAČ: Služba za prostorno uređenje i zaštitu okolice

PREDLAGAČ: Gradonačelnik

RAZMATRA I USVAJA: Gradsko vijeće

Srebrenik, maj 2026. godine

Na osnovu člana 8. Zakona o principima lokalne samouprave u FBiH ("Službene novine FBiH", broj 51/06., 51/09), članova 6. i 8. Zakona o komunalnim djelatnostima („Sl. novine Tuzlanskog kantona“, br. 11/2021 – prečišćeni tekst, 7/2025 i 2/2026), člana 2. Zakona o osnovama bezbjednosti saobraćaja na putevima u Bosni i Hercegovini („Sl. glasnik BiH“, br.6/06., 7/06-ispravka, 44/07, 84/09, 48/10 – dr.zakon, 18/13, 8/17, 89/17, 9/18, 46/23, 88/23) članova 2., 3. i 4. Odluke o komunalnim djelatnostima ("Službeni glasnik općine Srebrenik", broj 10/11, 2/14 i 19/25) i člana 14. i 25. Statuta grada Srebrenik ("Službeni glasnik grad Srebrenik", broj 1/24.), Gradsko vijeće Srebrenik, na sjednici održanoj dana _____ 2026. godine, donosi

ODLUKU

o javnim parkiralištima na području grada Srebrenik

I OPĆE ODREDBE

Član 1.

Ovom Odlukom se određuju javna i ostala parkirališta, utvrđuju uslovi i način njihovog korištenja, organizacija i način naplate parkiranja vozila, upravljanje i održavanje javnim i ostalim parkiralištima na području grada Srebrenik.

Član 2.

(1) Javna parkirališta su uređene javne površine namijenjene i saobraćajnom signalizacijom označene isključivo za parkiranje i zaustavljanje motornih vozila, a mogu biti uređena za parkiranje vozila na ulici i van ulice.

(2) Javnim parkiralištima na području grada Srebrenik upravlja javno preduzeće ili drugo pravno lice kojem Grad Srebrenik povjeri upravljanje posebnom odlukom Gradskog vijeća ili ugovorom (u daljem tekstu: Upravitelj).

(3) Ostala parkirališta su označene površine za parkiranje i zaustavljanje vozila u krugu javnih ustanova, javnih preduzeća i poslovnih centara.

Član 3.

(1) Javna parkirališta van ulice mogu biti otvorenog i zatvorenog tipa.

(2) Otvorena javna parkirališta su ona parkirališta koja zbog saobraćajne situacije nije moguće fizički zatvoriti preprekama.

(3) Zatvorena javna parkirališta su parkirališta koja se u cilju kontrole ulaza i izlaza vozila mogu fizički zatvoriti, a da se ne remete normalni tokovi saobraćaja.

Član 4.

(1) Javna parkirališta moraju biti označena saobraćajnom signalizacijom u skladu sa Zakonom o osnovama bezbjednosti saobraćaja na putevima u BiH (u daljem tekstu: ZOOBS) i Odlukom o sigurnosti saobraćaja na cestama općine Srebrenik („Službeni glasnik Općine Srebrenik“ br:11/11).

(2) Javna parkirališta za lica s posebnim potrebama i rezervisana javna parkirališta, posebno se obilježavaju horizontalnom i vertikalnom signalizacijom.

(3) Rezervisana javna parkirališta su prostori za parkiranje vozila rezervisanih od strane pravnih ili fizičkih lica kod upravitelja javnim parkiralištima.

(4) Uređenje i obilježavanje javnih parkirališta na kojima se naplaćuje parkiranje vrši upravitelj.

(5) Upravitelj je dužan uspostaviti i voditi evidenciju javnih parkirališta koja se ažurira po potrebi i dostupna je nadležnoj gradskoj službi a obavezno sadrži:

- naziv parkirališta
- lokaciju parkirališta
- zonu parkiranja
- ukupan broj parking mjesta
- broj parking mjesta za lica sa invaliditetom
- broj rezervisanih parking mjesta.

Član 5.

Javna parkirališta na kojima se naplaćuje parkiranje imaju na vidnom mjestu istaknuto obavještenje koje sadrži: naziv javnog parkirališta, zonu, vrijeme naplate, cijenu parking karte, način parkiranja i kategorije motornih vozila koja se mogu parkirati na tom parkiralištu.

Član 6.

Ulaskom na javno parkiralište na kome se vrši naplata, vlasnik ili lice koje upravlja vozilom, prihvata uslove parkiranja propisane ovom Odlukom.

II JAVNA PARKIRALIŠTA NA KOJIMA SE NAPLAĆUJE PARKIRANJE NA PODRUČJU GRADA SREBRENİK

Član 7.

(1) Javna parkirališta s naplatom na području grada Srebrenik, kategorišu se po vrsti i zoni parkiranja kako slijedi:

R/B	Naziv javnog parkirališta	Vrsta javnog parkirališta		Zona
		na ulici- van ulice	otvoreni- zatvoreni	
1.	Parkiralište kod objekata Robne kuće i JU Centar za kulturu i informisanje	van ulice	otvoreno	1
2.	Parkiralište ispred JU za odgoj i obrazovanje djece predškolskog uzrasta	van ulice	otvoreno	1
3.	Desna saobraćajna traka u ulici 1. marta,	na ulici	otvoreno	0
4.	Parkiralište s lijeve strane ulice 1. marta,	van ulice	otvoreno	0
5.	Parkiralište u ulici Dr Hašima Muharemović	van ulice	otvoreno	0
6.	Lijeve saobraćajna traka u ulici Dr Hašima Muharemović	na ulici	otvoreno	0

7.	Parkiralište u ulici Maršala Tita	na ulici/van ulice	otvoren	2
8.	Parkiralište u ulici TO 92. pored SP zgrade Tinjanka II,	van ulice	otvoreno	2
9.	Parkiralište u ulici Kulina bana ispred SP zgrade Srebrenka II,	van ulice	otvoreno	1
10.	Parkiralište u ulici Kulina bana između JU za odgoj i obrazovanje djece predškolskog uzrasta i SP Srebrenka II, uključujući i parkiralište na lijevoj saobraćajnoj traci pristupne saobraćajnice iznad zgrade Zlatiborka	van ulice	otvoreno	1
11.	Parkiralište u ulici Žrtava genocida u Srebrenici do željezničke stanice	van ulice	zatvoreno	1
12.	Parkiralište u ulici 21. srebreničke brigade iznad SP zgrada Bistrica I i II	van ulice	otvoreno	2
13.	Parkiralište u ulici Žrtava genocida u Srebrenici prema starom zanatskom centru	van ulice	zatvoreno	1
14.	Parkiralište u ulici 21. srebreničke brigade kod pošte	van ulice	otvoreno	1
15.	Lijeve saobraćajne trake do željezničke stanice i desne saobraćajne trake od željezničke stanice u ulici 211. oslobodilačke brigade	na ulici	otvoreno	2
16.	Parkiralište u ulici 21. srebreničke brigade ispred bivšeg objekta „SINBRA”	van ulice	otvoreno	2
17.	Parkiralište u ulici Bosanskih branilaca iza zgrade SP ”Autopijaca“	na ulici	otvoreno	2
18.	Desna saobraćajna traka saobraćajnice iza zgrade SP Bigeraj u ulici TO 92	na ulici/van ulice	otvoreno	1
19.	Parkiralište u ulici Bosanskih branilaca iza zgrade SP Tinjanka I	van ulice	otvoreno	1
20.	Parkiralište u Radničkoj ulici ispred zgrade suda	van ulice	otvoreno	2
21.	Parkiralište u ulici TO 92 ispred SP zgrade „SEKVOYA”	van ulice	otvoreno	2
22.	Parkiralište u ulici Ibrahima Salihovića ispred i oko zgrade JU sportsko rekreativni centar Srebrenik	van ulice	otvoreno	1
23.	Parkiralište u ul. Bosanskih branilaca ulaz na šetalište	van ulice	otvoreno	1
24.	Parkiralište u ul. TO 92, iza zgrade Gradske uprave	van ulice	otvoreno	1
25.	Parkiralište u ul. Maršala Tita kod zgrade „ITK Musić“	van ulice	otvoreno	2
26.	Parkiralište kod gradskog stadiona	van ulice	otvoreno	2

(2) U slučaju izgradnje novih javnih parkirališta ili proširenja postojećih parkirališta na području grada Srebrenik, gradska služba nadležna za poslove saobraćaja može privremeno odobriti parkiranje i naplatu na istim do donošenja nove odluke Gradskog vijeća.

Član 8.

(1) Naplata za parkiranje na javnim parkiralištima vrši se svakim danom osim nedelje i praznika u vremenu od 07.00 do 18.00 sati (zimsko računanje vremena), odnosno od 07.00 do 21.00 sat (ljetno računanje vremena).

(2) Izuzetno, upravitelj javnih parkirališta, uz suglasnost Gradske službe nadležne za poslove saobraćaja, može, zbog objektivnih okolnosti, odrediti i drugačije radno vrijeme koje mora biti istaknuto na javnim parkiralištima za koje se primjenjuje.

Član 9.

(1) Za korištenje javnog parkirališta korisnik plaća naknadu u iznosu kako slijedi:

Vrste karata	Cijena u KM sa PDV-om		
	Zona 0	Zona 1	Zona 2
Godišnja karta	400,00 KM	250,00 KM	200,00 KM
Mjesečna karta	40,00 KM	25,00 KM	20,00 KM
Dnevna karta	8,00 KM	4,00 KM	3,00 KM
Karta po satu parkiranja	2,00 KM	1,00 KM	0,50 KM
Povlaštena stanarska karta, godišnja		200,00 KM	150,00 KM
Povlaštena stanarska karta, mjesečna		20,00 KM	15,00 KM
Povlaštena karta za RVI, članove porodice šehida, demobilisani boraca, dobitnika najviših ratnih priznanja, godišnja		150,00 KM	100,00 KM
Povlaštena karta za RVI, članove porodice šehida, demobilisani boraca, dobitnika najviših ratnih priznanja, mjesečna		25,00 KM	10,00 KM
Rezervisana karta, godišnja	2.000,00 KM	1.500,00 KM	1.000,00 KM

(2) Način izdavanja i uslovi korištenja povlaštenih karata detaljno će biti uređeni posebnim aktom upravitelja.

(3) Izdavanje mjesečne, godišnje i povlaštene karte ne obavezuje upravitelja da za iste obezbijedi kontinuirano slobodno parking mjesto.

(4) Godišnja, mjesečna i dnevna karta važe za sva javna parkirališta u zoni za koju je karta kupljena i za sve niže zone.

(5) Rezervisano mjesto po godišnjoj rezervisanoj karti uključuje postavljanje fizičke prepreke od strane upravitelja.

(6) Na zatvorenom parkiralištu u ul. Žrtava genocida u Srebrenici ne važe mjesečne i godišnje karte.

Član 10.

(1) Vozilo s mjesečnom i godišnjom parking kartom može biti vremenski neograničeno parkirano na svim javnim parkiralištima na kojima se vrši naplata unutar zone za koju je parking karta izdata i u zonama nižim od te, a u periodu važenja parking karte.

(2) Mjesečna i godišnja karta mora biti vidno istaknuta na prednjem vjetrobranskom staklu motornog vozila.

Član 11.

(1) Za naplatu parkiranja na otvorenim javnim parkiralištima, koristi se parking karta iz automata za naplatu parkiranja ili parking karta plaćena elektronski putem SMS servisa ili parking karta plaćena elektronski putem pametne parking aplikacije. Za naplatu parkiranja na zatvorenim javnim parkiralištima koristi se ulazni print listić i izlazni print račun.

(2) Parking kartu, korisnik je dužan istaknuti s unutrašnje strane vjetrobranskog stakla vozila, na način da bude vidljiv serijski broj, te da iz nje ovlašteno lice za naplatu parkiranja može utvrditi podatke (godinu, dan, sat i minut početka parkiranja), osim u slučaju plaćanja iste elektronski putem SMS servisa ili elektronski putem pametne parking aplikacije.

(3) U izuzetnim slučajevima (kvar na automatu za naplatu parkiranja, nestanak struje i slično), naplata parkiranja u smislu stava 2. ovog člana može se izvršiti pomoću blok ovjerenih karti. Korisnicima javnih parkirališta i drugim licima je zabranjeno blokiranje, odnosno oštećenje automata za naplatu parkiranja (ubacivanjem neodgovarajućih kovanica ili drugih materijala i vršenje bilo kakvih radnji, kojim se prouzrokuje oštećenje automata za naplatu parkiranja).

(4) Ovlašćuje se upravitelj da svojim internim aktima detaljnije reguliše način plaćanja parking karte elektronski putem SMS servisa, odnosno putem pametne parking aplikacije.

Član 12.

(1) Korisnik otvorenog javnog parkirališta unaprijed plaća naknadu za planirano vrijeme parkiranja, a kod zatvorenog javnog parkirališta prilikom napuštanja javnog parkirališta prema podacima sa ulaznog listića.

(2) Korisniku zatvorenog javnog parkirališta bez ulaznog listića biće obračunato vrijeme od početka radnog vremena javnog parkirališta.

Član 13.

Parking karta plaćena na način određen članom 11. stav 1. ove Odluke je dokaz o uredno plaćenju naknadi za parkiranje na javnom parkiralištu. Sadržaj i izgled parking karata će biti detaljnije određen posebnim aktom upravitelja.

Član 14.

Kod naplate putem automata, korisnik javnog parkirališta, količinom ubačenog novca u automat, određuje dužinu plaćenog parkiranja.

Član 15.

Kontrolu naplate parkinga i pravilnost korištenja parkirališta kontroliše ovlašteni radnik upravitelja (u daljem tekstu: Kontrolor).

Kontrolor mora imati identifikacijsku iskaznicu na vidnom mjestu, na kojoj je ispisan naziv upravitelja, serijski broj i ugrađena fotografija kontrolora

Član 16.

(1) Za parkiranje vozila invalida, osigurava se određeni broj parking mjesta na kojima se ne naplaćuje naknada za parkiranje. Pravo korištenja mjesta za parkiranje vozila invalida ostvaruju invalidna lica koja posjeduju znak pristupačnosti, odnosno međunarodni znak invalida, a u skladu sa odredbama člana 29. Zakona o osnovama bezbjednosti saobraćaja na putevima u Bosni i Hercegovini (u daljem tekstu: ZOOBS) i odredbama Pravilnika o obilježavanju vozila kojim upravlja lice sa oštećenim ekstremitetima ili kojim se prevozi lice sa stepenom invaliditeta 80% i više.

(2) Za parkiranje vozila invalida na javnim parkiralištima potrebno je obezbijediti 5% parking mjesta od ukupnog broja parking mjesta (voditi računa o tome da parking mjesta budu u blizini javnih objekata kao što su Dom zdravlja, zgrada organa uprave, suda i sl.)

Član 17.

(1) Gradska služba nadležna za poslove saobraćaja posebnim aktom bezuslovno može na javnom parkiralištu ili dijelu javnog parkirališta odrediti, odnosno promijeniti namjenu, u određenom vremenskom periodu ili trajno u svrhu lociranja taksi stajališta, izgradnje objekata i sl.

(2) Taksi prevoznici obavezni su plaćati naknadu za zauzimanje parking mjesta u visini od 10,00 KM mjesečno, odnosno 120,00 KM godišnje.

(3) Odobrenje za korištenje i zauzimanje parking mjesta taksi prevoznicima izdaje služba nadležna za poslove saobraćaja grada Srebrenik na osnovu podnesenog zahtjeva.

Član 18.

(1) Na javnim parkiralištima zabranjeno je:

- parkirati neispravna i havarisana vozila;
- vršiti popravak vozila;
- odlagati smeće, ogrevni, građevinski i drugi materijal;
- vršiti bilo kakve radnje i aktivnosti koje bi mogle oštetiti javnu površinu, ugroziti sigurnost saobraćaja ili oštetiti parkirano vozilo;
- koristiti za dječije i zabavne igre;
- održavati javne skupove ili druge manifestacije ili priredbe bez prethodno pribavljene saglasnosti nadležnog organa;

(2) Izuzetno za potrebe stanara i korisnika poslovnih prostora koji nemaju drugu mogućnost, može se odobriti privremeno zauzimanje jednog parking mjesta na javnom parkiralištu, bez plaćanja naknade na period do 24 sata, radi istovara ogrevnog ili drugog materijala i slično.

(3) Odobrenje iz prethodnog stava za zauzimanje parking mjesta na javnom parkiralištu izdaje upravitelj.

Član 19.

Korisnik javnog parkirališta čini povredu odredaba uslova korištenja javnog parkirališta propisanih ovom Odlukom ako:

- Prekorači dopušteno vrijeme parkiranja
- Ne izvrši plaćanje parking karte na način određen u članu 11. stav 1. ove Odluke
- Ne istakne ili istakne neodgovarajuću parking kartu s unutrašnje strane vjetrobranskog stakla
- Ne pridržava se horizontalne i vertikalne signalizacije na javnom parkiralištu

Član 20.

(1) U slučaju povrede odredaba člana 18. ove Odluke, izvršit će se blokiranje vozila uređajem za blokiranje točkova.

(2) Poslove blokiranja i deblokiranja vozila će vršiti radnici upravitelja.

(3) Detaljnije odredbe o postupku blokiranja i deblokiranja, regulisat će se posebnim aktom upravitelja.

Član 21.

Naknada za blokiranja i deblokiranja vozila iznosi:

- 1) za blokiranje i deblokiranje kamiona, autobusa, priključnog vozila i radnog stroja - 30 KM
- 2) blokiranje i deblokiranje putničkih automobila - 15 KM

Član 22.

Naknade za premještanje i čuvanje vozila iznosi:

- 1) premještanje vozila na deponiju i ležarina do 24 sata – 150 KM
- 2) čuvanje vozila na deponiji po danu - 25 KM

Član 23.

(1) Premještanje nepropisno zaustavljenih, ili parkiranih vozila, vrši upravitelj, a na osnovu naloga PU Srebrenik, u skladu sa Zakonom o osnovama bezbjednosti saobraćaja na putevima u BiH.

(2) Detaljnije odredbe o uslovima, načinu premještanja, čuvanja i vraćanja nepropisno parkiranih vozila regulisati će se posebnim aktom upravitelja.

Član 24.

(1) Postupak premještanja vozila smatra se završenim kada je motorno vozilo spušteno na platformu specijalnog vozila "pauk".

(2) Prilikom određivanja premještanja, odnosno blokiranja vozila od strane ovlaštenog službenog lica prije početka premještanja, odnosno blokiranja, radnik upravitelja pravi Zapisnik o stanju vozila koje je određeno za premještanje, uz posebno evidentiranje već vidljivih oštećenja na vozilu koje se premješta.

Član 25.

Prije početka premještanja vozila, radnik upravitelja je dužan fotografisati vozilo i napraviti zapisnik o tome, a po mogućnosti napraviti video zapis i fotografije motornog vozila koje se premješta.

Član 26.

Troškove premještanja vozila na drugo mjesto i naknadu za smještaj tih vozila, odnosno blokiranje i deblokiranje vozila, snosi vlasnik vozila, odnosno lice koje upravlja vozilom.

Član 27.

Štete na vozilu nastale za vrijeme premještanja vozila, za vrijeme čuvanja na deponiji, odnosno blokiranja i deblokiranja vozila, snosi upravitelj.

Član 28.

Održavanje i uređenje javnih parkirališta u nadležnosti upravitelja podrazumijeva obilježavanje parkirališta horizontalnom i vertikalnom saobraćajnom signalizacijom, održavanje ostale opreme na parkiralištu, te čišćenje parkirališta i uklanjanje snijega s istih.

Član 29.

(1) Vozila hitne medicinske pomoći, policije i vatrogasna vozila, kada u toku intervencije koriste javna parkirališta ne plaćaju naknadu za parkiranje.

(2) Vozila pravnih lica koja su izvođači radova na javnim površinama (izgradnja i sanacija ulica, intervencija na vodovodnoj i kanalizacionoj mreži i sl.) za vrijeme dok se radovi izvode, u skladu sa odobrenjem nadležne gradske službe, izuzeta su od plaćanja naknade za parkiranje.

Član 30.

Upravitelj na javnim parkiralištima na kojima se naplaćuje parkiranje ne snosi odgovornost u slučaju otuđenja motornog vozila ili nastanka štete na istim.

Član 31.

1) Nalog za plaćanje dnevne karte izdaje ovlašteni kontrolor ukoliko uoči vozilo sa neplaćenom parking kartom na način da isti postavlja na vozilo, na prednjem vjetrobranskom staklu nakon čega je u obavezi uslikati vozilo na način da se vidi postavljeni nalog ili ukoliko je u mogućnosti uručuje ga lično korisniku uz potpis korisnika o preuzimanju.

2) Dostavljanje naloga za plaćanje dnevne karte na način iz stava 1.ovog člana smatra se urednim i kasnije oštećenje ili uništenje naloga nema uticaja na validnost dostavljanja i ne odlaže plaćanje dnevne parking karte.

- 3) Smatra se da je korisnik javnog parkirališta postupio po primljenom nalogu ako je platio dnevnu parking kartu u roku od 8 dana od dana izdavanja, na način naznačen u nalogu.
- 4) Ako korisnik javnog parkirališta ne plati dnevnu kartu, u roku iz stava 3.ovog člana, dužan je osim iznosa cijene dnevne karte, platiti i stvarne troškove upravitelja i zakonsku zateznu kamatu, na šta će u nalogu biti upozoren.
- 5) Ako korisnik parkirališta ne postupi u skladu sa stavom 4.ovog člana, upravitelj će pokrenuti postupak naplate potraživanja kod nadležnog suda, a troškovi prinudne naplate, zakonska zatezna kamata i drugi troškovi padaju na njegov teret.
- 6) Odobrava se popust u iznosu od 50% cijene dnevne parking karte za sve korisnike javnog parkirališta (pravna i fizička lica) koja dnevnu parking kartu plate u roku od 8 dana, od dana izdavanja dnevne parking karte.

III NADZOR

Član 32.

- (1) Nadzor nad provođenjem ove Odluke vrši Služba za prostorno uređenje i zaštitu okolice grada Srebrenik.
- (2) Inspeksijski nadzor nad provođenjem ove Odluke vrše komunalni inspektori grada Srebrenik.

Član 33.

Prekršajni postupak pokreće i vodi ovlašteno lice, odnosno komunalni inspektor, izdavanjem prekršajnog naloga ili podnošenjem zahtjeva za pokretanje prekršajnog postupka, na osnovu dokaza dostavljenih od strane ovlaštenog radnika upravitelja.

IV KAZNENE ODREDBE

Član 34.

Novčanom kaznom u iznosu od 500,00 KM do 1.500,00 KM kaznit će se pravno lice, u iznosu od 50,00 KM do 150,00 KM odgovorno lice u pravnom licu, u iznosu od 100,00 KM do 300,00 KM osoba koja obavlja samostalnu poslovnu djelatnost – obrt, te u iznosu od 30,00 KM do 100,00 KM fizičko lice:

- a) ako ne plati naknadu za blokiranje i deblokiranje vozila, utvrđenu odredbama člana 19. Ove Odluke;
- b) ako ne plati naknadu za premještanje i čuvanje vozila, utvrđenu odredbama člana 20. ove Odluke.

Član 35.

- (1) Novčanom kaznom od 1.000,00 KM do 3.000,00 KM kaznit će se upravitelj javnim parkiralištima ako se ne pridržava odredbi člana 4. stav 4. i člana 27. ove Odluke.

(2) Za prekršaj iz prethodnog stava ovog člana, kaznit će se i odgovorno lice upravitelja javnim parkiralištima novčanom kaznom u iznosu od 200,00 KM do 500,00 KM.

V PRELAZNE I ZAVRŠNE ODREDBE

Član 36.

Stupanjem na snagu ove Odluke prestaje da važi Odluka o Javnim parkiralištima na području grada Srebrenik („Sl. Glasnik općine/grada Srebrenik”, broj: 10/11, 2/19 i 1/22).

Član 37.

Ova odluka stupa na snagu osmog dana od dana objavljivanja u Službenom glasniku grada Srebrenik.

Bosna i Hercegovina
Federacija Bosne i Hercegovine
Tuzlanski Kanton
Grad Srebrenik
Gradsko vijeće
Broj: _____
Srebrenik, _____ 2026. godine

PREDSJEDAVAJUĆI
Gradskog Vijeća
Nisvet Sejdinović

O b r a z l o ž e n j e

I. Pravni osnov

Pravni osnov za donošenje Odluke o javnim parkiralištima na području grada Srebrenik sadržan je u relevantnim zakonima i podzakonskim aktima koji uređuju nadležnosti jedinica lokalne samouprave, komunalne djelatnosti i oblast bezbjednosti saobraćaja.

Naime, Zakonom o principima lokalne samouprave u Federaciji Bosne i Hercegovine propisano je da jedinice lokalne samouprave u okviru svojih nadležnosti uređuju i obezbjeđuju obavljanje komunalnih djelatnosti, upravljaju javnim površinama i donose propise radi njihovog uređenja i korištenja.

Također, Zakonom o komunalnim djelatnostima Tuzlanskog kantona utvrđeno je da komunalne djelatnosti od javnog interesa obuhvataju, između ostalog, i upravljanje javnim površinama i objektima komunalne infrastrukture, u koje spadaju i javna parkirališta, te se daje ovlaštenje jedinicama lokalne samouprave da bliže urede način obavljanja ovih djelatnosti.

Zakonom o osnovama bezbjednosti saobraćaja na putevima u Bosni i Hercegovini uređuju se osnovni principi sigurnosti saobraćaja, uključujući i pravila zaustavljanja i parkiranja vozila, kao i postavljanje i poštivanje saobraćajne signalizacije, čime se daje pravni okvir za uređenje saobraćaja u mirovanju.

Pored navedenog, Statutom grada Srebrenik propisano je da Gradsko vijeće, kao predstavnički organ, donosi odluke i druge opšte akte kojima se uređuju pitanja iz nadležnosti grada, uključujući upravljanje i korištenje javnih površina.

II. Razlozi za donošenje Odluke

Postojeća Odluka o javnim parkiralištima na području grada Srebrenik donesena je 2011. godine, te je u međuvremenu više puta mijenjana i dopunjavana. U proteklom periodu došlo je do značajnog povećanja broja motornih vozila, proširenja urbanih zona, izgradnje novih stambeno-poslovnih objekata i novih javnih parkirališta, što je uslovalo potrebu donošenja nove odluke kojom će se na cjelovit i sistematičan način urediti oblast upravljanja javnim parkiralištima na području grada Srebrenik.

Predloženom Odlukom preciznije se definišu vrste javnih parkirališta, način upravljanja, održavanja i korištenja javnih parkirališta, zone parkiranja, uslovi i način naplate parkiranja, prava i obaveze korisnika parkirališta, kao i nadzor nad provođenjem Odluke.

Odlukom su utvrđena javna parkirališta na kojima se vrši naplata parkiranja, izvršena je podjela na zone parkiranja, te su definisane cijene parking karata prema zonama i vrstama karata. Također su uređeni uslovi za izdavanje povlaštenih stanarskih karata, rezervisanih parking mjesta, kao i pogodnosti za ratne vojne invalide, članove porodica šehida i poginulih boraca, demobilisane borce i dobitnike najviših ratnih priznanja.

Poseban značaj Odluke ogleda se u uspostavljanju modernijeg sistema naplate parkiranja putem automata, SMS servisa i pametnih parking aplikacija, čime se omogućava efikasnije upravljanje parking prostorom i jednostavnije korištenje usluga od strane građana.

Odlukom su dodatno uređena pitanja parkiranja vozila lica sa invaliditetom, rezervisanih parking mjesta, blokiranja i premještanja nepropisno parkiranih vozila, kao i održavanja i

uređenja javnih parkirališta. Na ovaj način stvaraju se uslovi za veći stepen sigurnosti i protočnosti saobraćaja, efikasnije korištenje parking prostora, smanjenje nepropisnog parkiranja i unapređenje komunalnog reda na području grada Srebrenik.

Donošenjem ove Odluke stvara se pravni osnov za kvalitetnije upravljanje javnim parkiralištima, povećanje prihoda od naplate parkiranja, unapređenje komunalne infrastrukture i stvaranje uređenijeg i funkcionalnijeg urbanog prostora.

Za provođenje ove Odluke sredstva će se obezbijediti kroz redovno poslovanje upravitelja javnih parkirališta i prihode ostvarene naplatom parkiranja.

S obzirom na navedeno, predlaže se Gradskom vijeću Srebrenik da usvoji Odluku o javnim parkiralištima na području grada Srebrenik.

Obradivač

Služba za prostorno uređenje i zaštitu okolice